

諸司諸負匠人樂工樂生出番鷹師京畿京中下番軍士用之而開城府市民五六百亦為調用此皆無統雜亂烏合之衆五千名散在之民一齊聚合其勢極難其中都下之民尤為難齊必須預為整頓可免臨時生事著令刑曹漢城府及各司一一成冊移送本曹居在外方者行會各道限日上送如有不足之數則京畿京中下番軍士亦為調用宜當 從之○夜南方有氣如火光○以鄭世矩為司憲府掌令李景奭為弘文館校理○辛亥諫院啓曰 王世子書筵服色該曹以淺淡服稟定而自 上以為不可至降 嚴教臣等未曉 聖意之所在也世子本服只是期喪常時士大夫之期服者惟在喪次時著衰服宴居出入則布帶素衣至於公會則純用吉服況帝王家持服之制自與臣庶不同而世子之開筵臨講猶 殿下之視事也 殿下視事之服尚用白袍則世子書筵服色自當與進見時有間然則該曹所定淺淡服有或過而無或不及也冲年講學一日為急請依該曹所定以淺淡服從速開筵卒哭後更令該曹次第磨鍊 荅曰世子之服雖是期喪方在喪側用淺淡服似乎未安矣連啓乃 從之○癸丑禮葬都監啓曰明器服玩樂具今方造作而如鍾石磬祝敔等 廟樂所用則事涉嫌逼只俗樂唐箏洞簫唐箏篳篥鄉箏篳篥唐琵琶鄉琵琶